



Ruslandimut Belarusimullu killilersuutaasunik suliniuteqarnissat naammassineqarnissaat pillugit Kalaallit Nunaannut inatsisissamut siunnersuut pillugu Inatsisartut aalajangiiffigisassaattut siunnersuut.

(Naalakkersuisut Siulittaasuat)
(Siullermeerneqarnera)

Demokraatit Naalakkersuisut siunnersuutaannut uunga qutsavigaat.

Aallaqqaasiutitut paasinninnera annillara, killilersuutit tamatsinnut attuimmata. Isumarput unaavoq, qaqugukkulluunniit killilersuutit sivikitsuusassammata sapinngisamillu eqaattuusassallutik. Pingaartuuvortaaq, nunarsuarmi nunani killerni demokratiskiusumilu ilaanitsinni suleqatigiittariaqaratta sorsuutiguarlugulu tamat oqartussaaneranni pisinnaatitaaffitta amerlasuut pingaartuusullu, ukiorpassuarni ineriartortinneqarsimasut sorsuutiguarnissaat – soorunami tassani aamma tamat oqartussaanera inissisimavoq. Inuiaqatigiit kiffaanngissuseqartut assigiinngissutsinut ataqqinnittut, minnerunngitsumillu inuit pisinnaatitaaffisa ilisimaarineqarnerisa annertusartuarnissaat, qaqugukkulluunniit illersorlugillu sorsuutiguarartariaqarpavut – aamma maani Kalaallit Nunaanni.

A-mik oqarsimagutta aamma B-mik oqartariaqarpugut. Pisinnaatitsissut, Inatsisartut Naalakkersuisunut tunniussimasaat isumaqarpoq, Folketingip inatsisisai Kalaallit Nunaanni atuutilersinneqarsinnaasut. Taakkuluuku suliat amerlasuut aallaavigigut, suli suliassaqarfinnik angerlaassimanningsatsinnut. Naatsorsuutigineqarsinnaavormi Naalakkersuisut suliassani taakkunani Inatsisartut akuersinissaannut qinnuteqaateqarnissaat. Taamaattumik Demokraatit siunnersuutigineqartumut massuassutissaqanngillat, iluarisimaarlugulu takuarput nunanut allanut- sillimaniarnermullu ataatsimiititaliaq akuliutsinneqarsimasoq Naalakkersuisut ataatsimoorussamik danskit naalakkersuisuinut nalunaaruteqannginneranni. Taanna ataatsimiititaliaq annikitsumik pisinnaatitaaffeqalaaginnangikkuni pisinnaatitaaffeqanngereerpoq, oqartussaaffiit suli angerlaanneqarsimanningsut pissutigalugit. Taamaattumik akuttunngitsumik eqqarsartarpunga, kingunerisinnaagaa nunanut allanut- sillimaniarnermullu politikki piviusumiit kalaallinut innuttaasunut ungasissorjuusinnaanera.

Nunarsuaq allanngoriartorpoq, ukialunnguit matuma siorna tassanngaannartumik misigaarput, nunarput pisiariumaneqartoq. Pingaartitagut unaminartorsiortinneqartut corona pissutigalugu maannalu sorsuttoqartoq kikkulluunniit kissaatiginngisaannagaannik – naatsorsuutiginiikuunngisatsinnilluunniit pisussatut maannakkut piffissami nutaaliolfiusumi. Tassanngaannaq annertuumik eqqorneqaatigaarput paasillugu, nunanut allanut- sillimaniarnermullu politikki kalaallip nipaa ersernerluttoq. Nunarsuarmi allanngorartumi aamma ingasaassiniarneq uagut Kalaallit Nunaanniit sunniiffingarsinnaanngisarput. Tamanna oqallisiginngippallaaqaarput Inatsisartuni, imaassinnaasorlu tamanna pissutaanerpaasoq, Danmarkip akuttunngitsumik akuliutsissalluta ”puigortarmatigut”, Folketingimi aalajangiissatillutik.



Qujanartumik inuusuttunik nunarsuarmut tamarmut eqqummaarittunik kalaaleqarpoq, ilisimatusarnerup silarsuaani avitseqataasinnaasunik nunarsuarmullu angalasimasunik. Inuiaqatigiittut nunanut allanut-sillimaniarnermullu politikikkut nipip sakkortunerullunilu ersarinnerulernissaanik oqallinnissamut pisariaqartitsinerup oqaasinngortinnissaa pikkoriffigineruseriaqarparput. Maannakkullu isummertussanngorpugut, politikikkut qanoq ililluta suleqatigiinnermut pisussaaffilertariaqartugut kalaallip nipaa sakkortusarlugugu siuarsassanerlutigu.

Nalunngilara, allamut sangulaarlunga, qularutissaanngilarli erseqqissassallugu pingaartuusoq, killilersuutit taakku maannakkut ulluinnarni inuuniarnitsinni tamatta eqqormatigut. Aningaasat naleerukkiartorerata ima annertutigisumik atugarissaarnissatsinnut unammillernartoqartitsilersoq. Peqqinnartunik assigiinngisitaartunillu nerisaqarnissamik pilersaarusiorneq ilaqutariinnut aningaasatigut amikkisaartunut, maanna unamminarluinnartoq atuuppoq. Aammalumi ilaqutariinnut akunnattunik isertitalinnut tamanna atuulluni.

Taamaattumik pisariaqartinneqartorujussuuvooq, Naalakkersuisut ersarissumik ammasumillu sulinissaat maannakkut ajornartoorfiusumi nunarput inuiaqatigiillu toqqissisimanerulernissaannik suliniarneranni. Naalakkersuisunut inassutaali inassutaajuarlunilu ersarissaanissaq aammalu minnerunngitsumik, siumut isigaluni qanoq suleriuseqarnissaq, aamma ajornerpaamik pisoqassagaluarpat siumut ilisimatitsisarnissap annertusinissaa ulluni makkunani naatsorsuutigisassaangitsuni.

Ilaqutariit ataasiakkaat paasissallugu pisariaqartippaat, qaqugu qanorlu inuuniarnermikkut periarfissatik qanoq ilillutik pitsanngorsassanerlugit Naalakkersuisut sinaakkusersuinerat tunngavigalugu. Taamaattumik Naalakkersuisut pisussaattariaqaralarput innuttaasut oqaluttuutissallugit, taakku killilersuutit uagutsinnut Kalaallit Nunaanni qanoq kinguneqassanersut. Pisariaqarluinnanngippat akisuneruseriaqanngilaq, inuttut inuiaqatigiinnullu aningaasatigut.

Taamatut oqaaseqarluta siunnersuut Nunanut allanut- Sillimaniarnermullu ataatsimiititaliamut suliassanngorlugu innersuupparput.